

Parare Domino Plebem Perfectam

A lokisetse Morena Sechaba se phethehileng (Luka 1,17)

Moeletsi oa Basotho

www.moeletsoabasotho.co.ls

Lekala la Bohahlauli le tsoile letšolo **2**



Mokhothu o li phunya masoba **5**




Melao e lokela ho hlaka -Mpole **7**



POLAKI O BEHA LITSI POOANENG **3**

www.moeletsoabasotho.co.ls

Moeletsi oa Basotho



Re se re fumaneha ho marangrang

Email: newsroom@moeletsoabasotho.co.ls
Tel: +266 28350466/ Whats app: 62600983

MOELETSI

Furallang litloaelo

Moetapele oa Lekhotla la Sechaba (DC) ebile e le oa Bohanyetsi o behile kapel'a paramente maikutlo a hae malebana le khakanyo ea chelete ea selemo sa 2023/24. Ngongoreho ea hae ke hore ha ho fanoe ka tleho pele hore na chelete e sebelitse joang, ho so ajoa feela. Hape khakanyo ena e siile lintlha tse ngata tsa bohlokoa eo ea tsona e leng tlhopho-bocha eo 'muso o buileng hore o tlo e kenya tšebetsong. Qetellong ho hlahella eka bona e le bohanyetsi ba e eme kapele, empa ho se boithlaphiso bo hlakileng malebana le eona.

O lumellana le Letona la Lichelete hore ruri moruo oa naha o putlame, 'me lebaka le leholo ke hore naha e fetohile moreki ha e hlahise. Sena se fana ka qholotso ea hore ho etsoe maano le meralo mabapi le tlhahiso. Lipalo-palo tsa tlhahiso le theko ha se tse amohelang ho hang, 'me seo se ama nyollo ea meputso ea bahlanka habohlako.

Letona la Bophelo ha le hanane le litaba tse, 'me le kopa boeletsis ho tsoa ho mohlomphehi hobane ruri maemo a moruo ha se a jesang litheohelang, ka hona e le 'muso ba imetsoe ha ba tsebe hore na ba nka eng ba e kopanya le eng. Sechaba se thabela hona ha bohanyetsi le 'muso bo shebisana moo e bang 'muso o khibetse teng kaha ho se tjaka tlhoka koli, e khoptjoe e le maoto mane. Bobeli bona bo lokela ho sebetsa 'moho le 'muso ho bona hore lithoko tsa sechaba li'a arabeloa e se boichebo.

Ho na le melao e fetisoang paramenteng eo pelaelo e leng hore e fetisoa hobane e tšehelitse ke ba nang le thahasello ho eona. Maparamente a potlakela ho fetisa melao e fupereng letho, ebe a tlhela e leng molemong oa sechaba. Mekhoa le meetlo ea sechaba sefe kapa sefe e bohlokoa kaha e khetholla sechaba se joalo ho tse ling, ka hona maparamente ke khothaleto hore ha ba fetisa melao ba shebe e boulelang le ho sireletsa seriti le meetlo ea Basotho. Ho feta moo Basotho ba tlo iphumana ba se ba busoa ke melata kahar'a naha ea habo bona. Tlala e aparetseng naha e se ke ea fetola batho makhoba ka santhao ba sa bone, ebe joale ho s'o hlaha polelo e reng, "E bona mahe empa ha e bone leraba." Balichaba ba tla inkela Lesotho leo bo-ntat'a rona ba sebelitseng ka thata hore le fumane boipuso. Ana re ka thabela hore naha ee e felle matsohong a rona?

Ka lehlakoreng le leng Lekala la Bohahlauli ka kopanelo le Komiti ea Tlhophisetso ea Mekete e Mehola ea Naha le entse ntho e babatsehlang haholo ka ho etela Marena a Lihlooho a Mahlano a Setereke sa Maseru, nakong eo ho ketekoang lilemo tse 200 sechaba sa Basotho se thehiloe. Hona ke thuso e kholo ho moloko ona o mocha hore o tsebe nalane ea Marena a Lihlooho a Basotho, le hore na hobane'ng libaka li ile tsa rehoa mabitso, joalokaha Rothe e fumane lebitso la eona selibeng seo metsi a sona a neng a rotha lipakeng tsa mafika a mabeli.

Lekala le rerile ho boloka nalane ena ka mokhoa oa libuka 'me ea ka bang le tlatsetso holim'a eona h'a thibela. E ntse e le hona ho tlatsetsa tabeng eane ea hore sechaba se sa tse-beng meetlo ea sona sea timela, re thoholetsa lekala ke hona ka morero ona. E feela le bone hore nalane ea Basotho e ntse e qepha letsatsi le letsatsi. Hoja thuto ea nalane e ne e ka rutoa likolong haholo-holo tsa mathomo, ho tlheloe hore bana ba shapuo e ha bua Sesotho e leng puo ea habo bona. Bana ba hole ba tseba nalane e se re somane ka hore motho ke koata, ebe re mo qobella hore a fetohle lekhoaana-tsoana. Hantle ke mang ea ileng a re hlohisa Sesotho sa habo rona hakaana? Lichaba tsee tse ntseng li rata le ho boulela meetlo ea tsona li entse joang? Basotho khutlelang mekhoeng ea lona, le boulele se le etsang Basotho le tlhela ho khahloa ke lintho tseo le sa tse-beng hore na li tsoa kae. Tsepamang thutong eo le e fuoeng ho tloha boseeng ba lona, imatlafatseng ka eona 'me le fetohle barui ba meetlo ea lona. Ikhantšeng ka se habo lona.

Lekala la Bohahlauli le tsoile letšolo

Nthabeleng Seitlheko

Lekala la Bohahlauli ka kopanelo le Komiti ea Setereke sa Maseru ea Tlhophisetso ea Mekete e Mehola ea Naha, le tsoile letšolo ho bokeletsa nalane ea libaka tsa Marena a Lihlooho a tikoloho ea Maseru, e le ntšet-

hakalana, o boleetse barutoana ba etsang boithuto ka litaba tsalane, litichere tsa Likolo tse Phahameng le baemeli ba sechaba ba bileng teng moo li-ofising hore 'moko-taba oa morero ona oa ho bokeletsa nalane ea Marena a Basotho, o ipapisitse le mohoo oa lilemo tse 200, o reng: "Rea tsoaloe, boitekolo le tsoalo."

A re selemong sena seo

ka seo se ile sa bitsoa Rothe hobane mehleng ea pele, ho ne ho e-na le seliba kahar'a motse oo oa Rothe, se neng se rothisa metsi lipakeng tsa majoe. A re Morena oa Pele oa Sehlooho oa Rothe e bile Morena Bereng mor'a Morena Letsie I, moena oa Morena Lerotholi, a hlahlangoa ke Morena Sekhonyana e leng mor'a hae, ea tla ba Morena Bereng ea nt'o ba Morena Mohlalefi. A re Morena Bereng o ile a tlisoa Masite ka 1870. A re ntata'e ke Morena Bereng eo ha



sopole ea ketekelo ea ho tsoaea Mokete o Moholo oa lilemo tse 200 sechaba sa Basotho se thehiloe. Letšolo lena le qalile Moreneng oa Sehlooho oa Rothe, Maseru, ka la 19 Tlhakubele 2024.

H'a fana ka molaetsa oa bohlokoa oa letsatsi leo, Mookameli oa Lefapha la Bohahlauli ebile e le Setsebi sa nalane Mofumahali 'Malesenyehlo Ntl-

naha e ketekang lilemo tse 200 Morena Moshoeshe I a ile a kopanya sechaba sa Basotho, ba ile ba ikeletsa ka tšebeliso 'moho le Ofisi ea 'Musi oa Setereke sa Maseru hore ka khoele ena ea Tlhakubele, ha ho ketekelo letsatsi lena, ebe bona ba etela Marena a Mahlano a Sehlooho a Setereke sa Maseru ho bokeletsa nalane ea libaka tsa bona le ea marena.

A re morero ke ho etsa tokomane ea marena ana a mahlano a molemong oa meloko e tlang. "Tokomane ena e ka ba le litlatsetso e le hore moloko o tlang o tle o e sebelise molemong oa ho tseba nalane ea marena a habo bona." A rialo.

Morena oa Tšoeneng, Morena Bereng Letsie h'a lokolisa nalane ea sebaka le marena a Rothe o itse seba-

habo e leng hona Rothe, 'me o ile a ntšoa motse a isoa Tšoeneng. A re Morena Bereng ke mor'a Morena Letsie I, e leng moena oa Morena Mofolo e leng moholoane oa Morena Theko. A supa hore kaofela ha bona ke bara ba Mofumahali 'Mantai.

A re ka 1879 Morena Bereng o ile a nyala, 'me a ba le mora e moholo ka ntoea ea lithunya ea 1880, e leng Morena Sekhonyana. A tiisa hore Morena Sekhonyana o ile a hlahela ka lehaheng khoahlong ea Masite ka lebaka la ntoea ea lithunya, hobane basali le maqhekoana ba ne ba balehisitsoe motseng ba patiloe ka lehaheng. A phethela ka hore Morena Sekhonyana ke eena Mosotho oa pele Lesotho mona oa ho ba le koloi.

Contacts: +266 28350 466 / 6260 0983 (Whats app)
Email: moeletsioabasotho@gmail.com

MOELETSI oa BASOTHO
A LOKIBETSE MORENA SECHABA SE PHETHEILENG (LUKE 1:17)

Editorial

Lesoetsa Rakubutu (Editor)
(+266) 58490670 / 62031949
editor@moeletsioabasotho.co.ls

Lehlohonolo Mohale (Sub-editor)
(+266) 58 771 507 / 62 771 507
subeditor@moeletsioabasotho.co.ls

Advertising

Thabo Lesaona
(+266) 28 350 466/ sales@moeletsioabasotho.co.ls

Newsroom

Nthabeleng Seitlheko 57 665 038/ 68 216 721
nthabeleng.seitlheko@moeletsioabasotho.co.ls

Tšelisio Thakholi (Sports) 58 540 853/ 62720730
tseliso.thakholi@moeletsioabasotho.co.ls

newsroom@moeletsioabasotho.co.ls

Production Desk

'Mateele Liqa, Sr. Canicia Nthunya

Polaki o beha litsi pooaneng

Nthabeleng Seithheko

Monamoli Adv. Tlotliso Polaki o re ha se 'nete hore batšoaruoa ba neng ba katloe ke bahlanka ba Litsi tsa Tlhabollo ea Batšoaruoa (LCS) ba ne ba hana ho phopholetsoa empa bahlanka ke bona ba fihlileng ba ba khakhatha ka melami le lithupa. Tsena li hlaleletse tlalehong ea hae, ka la 19 Tlhakubele monongoaha.

O re lipatlisiso li sibotlotse hore ka la 22 Tšitoe ngoahola batšoaruoa ba robong ba ile ba shapuo hobane ba ne ba sa utloisisane le bahlanka ba LCS, 'me har'a ba 650 ea batšoaruoa ba fumane hore ba 300 ba shapilo hamphe ka letsatsi leo. O bontša ha batšoaruoa bao ba bile sebakeng seo lilemo tsa lipakeng tse tšeletseng le tse supileng, ka hona ho ka se be bobebe hore ba ka etsetsa bahlanka khang kaha ba se ba tseba tsamaiso.

Polaki o re batšoaruoa ba lula libakeng tse fapaneng, 'me ha ba ne ba phopholetsoa ho shejoa hore na ha ho na lintho tse sa hlokaleng tseo ba keneng ka tsona ba ka be ba sa kakatoa ba le bakaaolo. A re ba bile ba shebella setšoantšo se tsamaeang ho sheba tšebetso ea ka setsing, 'me ba fumane hore



ba phopholetsoa ka mokhoa o sa amoheleng, kaha ba bang ba tšoaroa ka liaparo tsa bona le ho khanoa hamphe.

O re hantle batšoaruoa ha ba phopholetsoa ba ema ka lebotla kaofela ho netefatsa hore ha ba na matekoane le mehala ea thekeng. O re ba utloile hore ka la 22 Tšitoe ngoahola bahlanka ba LCS ba ile ba kena ba le bangata ka setsing, ba ba shapa ka mahetleng, litonong le thekeng, 'me o re ho sa tsotellehe hore bao ba entse phoso kapa che hoo ke tlolo ea molao.

H'a tsoelapele o bontšitse hore bahlanka ba LCS ba ntseng ba le koetlisong

ba bile sebakeng seo ka taelo ea mookameli oa bona, ho latela tšebetso ea litsi. O re bao ba bonahala ba patana 'me hoo ke tlolo ea molao.

A re ka la 21 Tšitoe ngoahola, batšoaruoa ba tšeletseng ba ile ba thoba ka setsing, ba fumana ba babeli ba bang ba fumanoa ba le palehong, ke moo bao ba ileng ba kakata e mong leha a se a amohetse hore o entse phoso o ne a tl'o khutla.

O re litaba tsena li ea nyarosa kaha li entsoe ke bahlanka ba nang le lilemo tse 'ne ho isa tse 10 ba se ba ile ba rutoa ho etsa mosebetsi, ba tseba le me-

lao e ba tsamaisang. Har'a batšoaruoa ba hlokalitsoeng e mong o lahlehetsoe ke bophelo, ha e mong a lemetse a ke ke a hlola a tseba ho itsamaisa a se a tla sebelisa setulo-koloi eona (Wheelchair).

Monamoli o khothalelitse hore bahlanka bohle ba neng ba ikarabella setsing ka nako eo ba lokela ho nka boikarabello, kaha mosebetsi oa bona e le ho sireletsa batšoaruoa, 'me ba neng ba bulela batšoaruoa letsatsing leo ba qosoe le ho nkeloa methati ea khalemo.

A re ke bonyane bahlanka ba LCS ba 40 ba tlamehang ho nkeloa likhato tsa molao. A ipiletsa ho sepolesa

ho etsa lipatlisiso mabapi le lefu la motšoaruoa ea ileng a hlokalalla matsohong a bahlanka bao, 'me bohle ba keneng 'momoring oa ho khakhatha batšoaruoa ba nke boikarabello.

Litabeng tsena monamoli o fane ka nako ea likhoeli tse tšeletseng hore tsa be li kentsoe tšebetsong. O re mosebetsi o moholo ke ho bona hore bohle ba nka boikarabello litabeng tseo ba li entseng, 'meka thuso ea bophatlalatsi ba tla bona hore mafapha a amehang a nkeloa likhato. Qetellong ha likhothaletso tsena li sa phethahatsoe ke Letona la Toka le Molao, o tla tlalehela paramente.

Maparamente a fetole boinahano

Nthabeleng Seithheko

Mothehi oa Lekhotla la Tokoloho ea Sechaba (BDC), Molibeli Soro, o re ho bohlokoa hore maparamente a ipehe tlasa khatello ha ba sebetsa litaba tsohle tsa sechaba, le ho bona hore li kenngoa tšebetsong. O hlalositse tsena, puisanong le Koranta, ka la 20 Tlhakubele monongoaha.

O re maparamente a hlocomele ho fetisa melao e sa hananeng le mekhoha, meetlo, tloaelo le bochaba hobane hoo ho ka ba kotsi kaha ba shebile chelete, ba lebala hore Naha ea Lesotho e ikemetse. O re e bang naha e ka fetoloa sesebelisoa sa linaha tse ling ho tl'o ama bolokolohi, kholo le nt-



lafatso ea eona.

Soro o re Naha ea Lesotho e tlameha ho fetisa melao e molemong oa naha e seng ho qekisa balichaba, ba sia melao ea tlhopho-bocha tsietsing. O re se etsoang ke maparamente ke ho rekisa naha hoo qetellong e tla qetella e se e hloka boikemelo. A re ke nako hore Basotho ba ke ba etse khetho e nepahetseng, e sireletsang naha eseng ho sobokelloa ke balichaba.

A re molao o sireletsang sechaba ka poloheho ea marang-rang ha o potlakeloe joaloka ea balichaba hobane e se na chelete, e thibelang bosholu le lipolao kahar'a naha le eona ke bothata hore e fetisoe. A re hona ke bokhopo bo etsoang ke maparamente kaha litaba tsena li se mol-emong oa Basotho.

A re lichaba tsohle li etsa melao ba shebile litloaelo tsa bona, ha ba re ho

khetholloe ngoana oa ngoanana ho oa mohlankana, empa bohle ba abeloe toka litabeng tsa mafa.

H'a tsoelapele o re maparamente a bontšitse hore a ka fetisa melao ea naha ena ka nako e khutšoanyane ha ba rata, leha ba behiloe tlasa khatello ke ba nang le lichelete, empa litaba tse molemong oa mafutsana ha ba re letho ka tsona.

O re joaloka mopolotiki ho bohlokoa hore Basotho ba ke ba shebe hantle mofuta oa baetapele, bapolotiki le maparamente bao ba ba khethang hore ba ichebile bo bona ha ba natse litaba tsa bona kaha ba behiloe merebele ke Ma-Amerika.

O re Naha ea Lesotho ha e lokele ho amuo boikemelo ke batho ba shebileng chelete ba lebetse boemo ba eona le matlotlo ao ba nang le ona. A re ke nako ea hore maparamente a falimehe a se itumelle ho sebelisoa ke balichaba hore naha e tsebe ho tsoelapele.

Bahlahisi ba lihoapa

Tšeliso Thakholi

Abuti Kananelo Letsie ke letsoalloa la Ha Mabote Seter-ekeng sa Maseru, a hola joaloka ngoana e mong le e mong oa Mosotho a kena sekolo ho fihlela a etsa Form E. Kamor'a hore a qete sekolong o ile a khahloa ke e mong oa bahai ba motseng oa habo ea neng a etsa lihoapa. Mohai enoa o ile a qala a sebetsa le Letsie, 'me a mo ruta ho li etsa. Ke hona moo a ileng a qala ho ba le thahasello ea ho iqalla khoebo motseng oa habo.

A kopana le bacha ba bang ba bararo bao a ileng a ba hlalosea morero oa hae oa hore ba ikopanye, ba ke ba etse khoebo ea mofuta oa eona e sa tloaelehang motseng. Bacha bana ba ile ba phamolela morero ona oa hae holimo, 'me ba ikopanya ho qala khoebo e bitsoang Makhuzo Snack.

QALEHO EA MOSEBETSIS

Re qalile hantle ho etsa mosebetsi ona oa rona ka selemo sa 2019, 'me re rekisa hona motseng mona. Ka selemo sa 2020 khoebo ea rona e ile ea thefuloa haholo ke seoa sa COVID-19, hoo re bileng ra tlameha ho emisa. Selemo seo ebile seo re ke keng ra se lebala bophelong ba rona. Leha ho le joalo, ha re ea ka ra khathala matla, re ile ra 'na ra tsoelepele tlasa maemo ao a joalo a hloabaetsang, re ne re hula ka thata haholo. Selemong se hlahlamang ra 'na ra tsoelapele ka matla a maholo.

MOKHOA OA HO FUMANA NAMA

Mokhoa oa ho fumana nama o bobebe haholo, kaha ha khoebo e tsamaile hantle re atleha ho reka khomo ho Basotho ba nang le liphoofole. Empa ha thekiso e se ntle re e reka ho a mang a mabenkele a rekisang nama.

TLHAHISO EA LIHOAPA

Tliahiso ea rona e laoloa ke hore na re rekile nama ho kae. Ha re rekile nama



mabenkeleng a rekisang nama, re atleha ho hlaha lihoapa tse ka bang 400 ho isa ho 500 ka letsatsi. Empa ha re rekile khomo eo e leng ea rona, re hlaha tse 1000 ho ea holimo ka letsatsi.

HO FUMANA 'MARAKA

Ka 'nete ho fihlela ha joale tšebetso ea rona e ntse e tsamaea hantle, hoba thepa ea rona e se e fumaneha likhoebong tse kholo tse ka bang 15 kahara toropo ea Maseru, le batho ka bomong re ea ba rekisetsa hona motseng mona. Lihoapa tsa rona ke tsa maemo a holimo haholo, kaha re se re sebelisa thepa ea sejoale-joale ho li etsa.

SEPHEO SA KHOEBO

Morero o moholo oa khoebo ena ea rona ke ho hlalohisa bacha mosebetsi. Re rata ho bona e hola ho feta mona e le hore re tle re tsebe ho nanabetsa letsoho ho thusa bacha ho itšematlela. Re boetse

re rata ho bona Makhuzo Snack e fepela Naha ea Lesotho le kantle ho naha ka lihoapa.

LIQHOLOTSO

Leha mosebetsi oa rona o bonahala o e-na le katleho, qholotso e kholo eo re kopanang le eona ke khaello ea nama moo re e rekang teng. Che, le hoja sena se sa etsahale ka mehla empa re na le bothata ba ho lieha ho fumana nama.

KELETSO HO BACHA

Bacha ba heso bakomoso ba Naha ea Lesotho bo matsohong a lona. Emang ka maoto le itšoarele ka matsoho ka ho iqalla likhoebo tse fapakaneng, le ntse le le metseng ea habo lona. Sena se tla tseba ho le thusa ho loantša tlala le tlhokahalo ea mosebetsi. E bang le boqapi ba mefuta e fapakaneng ea likhoebo, e be lea ikopanya ka litsebo tseo tsa lona tse fapakaneng le itlhalisetse mosebetsi.

Ho bacha ba ka ratang ho tla nka malebela ka tšebetso eo re e etsang, mamati a bulehile, re tla le fa kahare ho letsoho. Bacha linako li fetohile ratang mosebetsi ea matsoho le se ke la tšepa feela ho hiroa, 'me ha le qeta likolong ka litsebo tseo tsa lona le sebeletse ho itlhalisetse mosebetsi.



BASOTHO FOOD TASTING FESTIVAL

DATE: 2 - 4 August 2024
Venue: Boqate Leisure Park

MORE DETAILS LOADING...





SPONSORS:





Melao e lokela ho hlaka-Mpole

Nthabeleng Seithoko

Muso o lokela ho sireletsa mobu oa temo ho se ke ha sehoa litša kahar'a masimo, moo batho ba lokelang ho etsa mesebetsi ea temo le ea boitšematlelo. Tsena li hlaheletse puisanong le Raliphatlatso oa Mokha oa LPC, Telang Mpole, ka la 20 Tlhakubele monongoa.

O re seo se ka thusa naha ho hlahisa mesebetsi molemong oa bacha le sechaba sa Basotho. A re tla e tjametseng malapa a mangata e bakela naha litlolo tsa molao, lipolao le lithekefetso kaha sechaba se lapileng se sena tsebe.

O re ho bohlokoa hore libaka tse ka sebelisoang

e le tsa ntlafatso li thusoe ho sireletsoa ka molao le tlhahiso, kaha neheletsano ea moruo e le qholotso. A re thuto ea Naha ea Lesotho ha e tsoele bacha ba bangata molemo ka lebaka la lenane-thuto le boemong bo fatše, 'mesena se etsa hore batho ba bangata ba senye nako ea bona ka ho nka mangolo a se nang thuso.

O re ho bohlokoa hore 'muso o tsetele thutong ea mesebetsi ea matsoho, kaha seo se tla thusa hore ho theoloe sekahla sa tlhokahalo ea mesebetsi kahar'a naha. A re 'muso o tlameha ho phatalatsa taba ena ea tlhokahalo ea mesebetsi e le tlokotsi, kaha sena se tla thusa hore naha e balehe tla le litlolo tsa molao tse atileng.

A re mebuso e lokela ho lomahanya meno ha e lebane le likhoebo tsa



FASHION

SHOW

TIME
6PM
TILL LATE





GENERAL
TICKET
M70

FOOD &
DRINKS
M200

RUNWAY TO
BREAK THE RULES

SATURDAY
MARCH 23
2024

VENUE: MANTHABISENG CONVENTION CENTRE



Tebello



Teba

PERFORMANCE BY


Sotho Kids


Omali Themba


'Malichelete


Chief Fasa


Mochana


Master Dj

FOR MORE INFO CONTACT  (+266) 5852 4642/ 6393 9207









melata, ho qoba ho lebanya thebe le likhoebo tsa Basotho. O re boholo ba likhoebo tsa Basotho li shoele ka lebaka la melata e nang le matla khoebong.

O re ha se hore Basotho ha ba na bohlale empa melata e nketse Basotho mesebetsi ka lebaka la melao e sa sireletseng khoebo ea Basotho. A re ho bohlokoa hore melata e ntšoe kahar'a metse, bona ba sebetse e le bahoebi ba baholo molomong oa neheletsano ea mosebetsi le tlhahiso e behang litholoana.

O bontšitse ha taba ena e tšoenya hobane Basotho ba qheletsoe thoko khoebong, ha ba ne ba tlameha ho sireletsa khoebo ea bona khahlanong le melata. A re ntho e khoehlileng ke melao ea bojaki moo molata o fetohang Mosotho ka nako e khutšoanyane, ka hona melao ena e tlameha ho thatafala e le hore ho se be bonolo hore melata e iketsetse se ratoang ke bona.

O re sekheo lipakeng tsa melata le Basotho se seholo, kaha boholo

Basotho ba fetohile mekopa-kopa le lisebelisoa mabankeleng a melata. A re ho bohloko ho bona Basotho ba nyahlatsa likhoebo tsa bona ba fetoha lisebelisoa tsa melata, ka hona naha e tlameha e tle ka maano a boikhollo bofumeng a moshoelella.

H'a phethela o re o tšoenyehile haholo ke melao e sekamelang ho matlafatsa paramente eseng litaba tse amang bacha joaloka melao e sireletsang khoebo, hobane e teng e na le likhoqetsane tse boima tseo ho seng bonolo ho bacha ho li fihlela ho latela boima ba tla, tlhobolo le bofuma.

A bontša ba tšoare ka thata ho bona hore bacha b'a ntlafala litabeng tsa boitšematlelo, khoebo le bophelo bo botle. A re ba ke be ba khutsa ho fihlela 'Muso oa Lesotho o sebeletsa ho ntlafatsa bacha eseng ba lelekoee mesebetsing, empa mesebetsi ea lintlafatso metseng e felisitsoe e ne e atleha ho tšoarela bacha ha ba ntse ba ithlhopela ho tsoelapele bophelong ba bona.

Bacha ba laba-labela lipheto



pelei, e boetse e shebane le litaba tsa thari le thobalano hore litokelo tsa bona li hlonpshoe le ho felisa HIV /AIDS. A re ba ananela bohlokoa ba ICPD, ka hona ba tl'o keteka lilemo tse 30 e le teng e le lentsoe la bacha 'me ba tl'o bonts'a hore na e fihletse eng.

'Maseretse Ratia ho hlaha UNFPA o itse bacha ba bue litaba tsa bona. A re ba batla ho sheba lintho tse fihletsoeng ke naha tseo ba ka reng ba motlotlo ka tsona le liqholotso tse amang bacha litabeng tsa thari le thobalano, le hore na ba hloka ho etsahale eng.

Ofisiri ea Liphatlalato UNFPA Violet Maraisane, ha manolla ICPD o supile e le 'moka o neng tsoareloe Cairo, mebuso ea lumellana ka meoloane ea 'moka ona, ke oa pele oo ho ona United Nation's e neng e hlalose hore 'Sexual Reproductive Health' ke eng, 'me ha ho ka moo linaha li ka ntlafalang ha ho sa buoe ka litaba tsa thari le thobalano. Morero oo o ile oa shebana le lintho tse ngata, ba tataisoa ke ICPD 'me lilemong tse hlano ho etsoa tlhahlobo. Ka selemo sa 2013 ha e ne e lokela ho felloa ke nako matona a Afrika a supa e tla tsoelapele ho etsa lintho tse reretsoeng ho ntlafatsa bohle, ho se shejoe lipalo feela empa ba shebe litokelo tsa batho bohle ba phelang linaheng tsa habo bona.

'Matšepang Sai ho tsoa Lekaleng la Thuto le Koetliso, o re o thabetse ho bona bacha ba kenya letsoho litabeng tse ba amang. A re oa bona e le makala ba lokela ho etsa lintho 'moho ho hlola liqholotso tse tobaneng le bacha. A re mafu nakong ea peleli ba batla a fele, tthekefetso likolong 'moho le litsoaetso tse ncha tsa HIV.

Nthabeleng Seithleko

Bacha ba re ke tokelo ea bona ho fumana litšebeliso tsa bophelo maemong ohle ka linako tsohle, ba bile ba thusoa ke lithaka 'moho le bona hore ba tsebe ho phutholoha. Tsena li hlaheletse ketekelong ea lilemo tse 30 ho ne ho thehoe ICPD, ka la 18 Tlhakubele monongoaha.

Ba re litokelo tsa bona tsa mantlha tsa botho ha li hlonpshoe Litsing tsa Bophelo, ebile ba bang ba bacha ba tšaba ho ea batla kalafo hobane ba sa fumane litšebeliso tsa boleng. Ba re naha e ntse e tobane le phepetso ea lenyalo la bana ba tlaase lilemong, leha e le hore ke ntho e seng e fokotsehile, 'me tlhokahalo ea mesebetsi le bofuma ke tsona tse susumetsang boemo bona.

Ba bontša hore ba hloka hore litsing tsa bophelo ho be le litšebeliso tsa ho okeloa mafu a likobo har'a tse ling 'me li fumanoe mahala, lithahlobo tsa HIV/AIDS sebakeng sa bana nang le bokooa e ke e be tsa mekhoea e bolokehileng molemong oa lekunutu la bona, le ho bona hore ba fumana litšebeliso ka ho ba le batho ba utloisisang litlhoko tsa bona.

Ba supile ha ho le bohlokoa hore mesangoana

e sebelisoang ke basali le banana nakong eo ba leng linakong e ke e fumanehe mahala, kaha ho ntse ho e-na le bana ba sa sireletsehlang khahlanong le mafu a bakoang ke seo, hobane ba ntse ba sebelisa masela le ho se ee sekolo e bang ba le linakong.

Ba re mafu a mangata a ka fela ha bohloeki bo bolokiloe ho basali hape ba eleletsoe hore khaello ea tsebo le kutloisiso litabeng tsa bophelo e ntse e le qholotso.

Mookameli oa UNFPA Innocent Molisoatsoile, o itse 2024 ke selemo se ikhethang kahar'a mafapha ohle a sebetsanang le litaba tsa bophelo bo botle, ka hona ba hetla morao ho sheba

lintho tse fihletsoeng ho tloha 1994, moo ho bileng le sechaba se ileng sa khobokana Cairo, Egypt.

A re 'moka oo o ne o khotlaetse hore lintho tsohle tseo ba li etsang ba qale ka litaba tsa botho pele, 'me litokelo tsa bohle li eloe hloko. A re ho tlo ba le 'moka e meholo e 'meli e tl'o tsoareloa bacha ho hetla morao le ho sheba hore na ba lokela ho sebetsa joang litabeng tse ba amang eleng thuto le bophelo bo botle.

A re ba bone ho le bohlokoa hore pele 'moka oa pele o tsoaroa bacha ba Lesotho ba khobokane 'moho e le hore ho be le seo ba se etsang. O re ba rata hore litabeng tsa bophelo bo botle bacha ba kenye let-

soho ka matla.

Nthabiseng Mofuoe Maimane lebitsong la Lekala la Tekano, Bacha le Ntšetsopele ea Sechaba o itse e le lekala la bacha ba fuoe thomo ea ho otlala bacha mahlakoreng ohle a bophelo eleng moruo, bophelo bo botle le boitšematlelo, empa ha ba etse mosebetsi oo ba le bang ba tataisoa ke leano la bacha la 2017- 2030, 'me ba na le mananeo ao b'a sebelisang ho atamela litaba tsa bacha.

A re bacha ba tobane le liqholotso tse ngata tsa letsatsi le letsatsi, b'a hleketsoa, ba kena lenyalong ba le tlaase lilemong 'me UNFPA e sebetsana le ho bona hore ha ho na mocha ea ka shoang nakong ea



Mokhothu o li phunya masoba

Nthabeleng Seitlheko

Moetapele oa bohanyetsi, Mohlomphehi Mathibeli Mokhothu, o phuntse kopo ea khakanyo ea lichelete masoba hore e arabele litlhoko tsa sechaba, ka meralo le maano a ntlafetseng. Tse-na li hlaheletse tulong ea paramente ea la 20 Tlhakubele monongoaha, moo Letona la Lichelete, Dr. Retšelisitsoe Matlanyane, a neng a kopela makala a 'muso lichelete.

O re khakanyo ea lichelete ha e nepahetse e lokela ho hlalosa hore na chelete ea selemo se fetileng e sebelitse joang, le maano le likhafa li lokela ho totobala ka ho felehetsoa ka melao le melaoana.

A re e lokela ho hlalosa na ho kenngoa metsi kae le lintlafatso ba ipehele nako ba se ke ba fetisa khakanyo ea lichelete e lefifi ho sa hlake hore na ho tla sebelisoa nako joang. O re seo ha se tl'o ba koala molomo e bang 'muso o sa itlhakisi.

O re ba lokela ho etsa tlhahlobo ea tšebeliso ea lichelete tsa sechaba. A re b'a eelloa hore khakanyo ea lichelete e koala leqephe la lilemo tse 200 sechaba sa Basotho se thehiloe, empa ha b'a etsa boitlhahlobo ba hore na ho fihlela ha joale ba tsamaile joang, kaha moralo oa Vision 2020 o feletsoe ke nako.

O re ba hloka lilemo tsena e be tsa khotso tse etsang hore ho be le toro le chebelopele kaha ba lokela ho lokisetsa lilemo tse 200 tse tlang. A ba khothaletsa ho etsa moralo oa nako e telele mohlomong ba shebe hore na lilemong tse 30 tse tlang ba tl'o tsamaea joang.

O re naha e lokela ho falla mokhoeng oa ho fetoha bareki empa e be bahlahisi. A re ho aha moralo o mocha ba lokela ho sheba hore na ba ile ba khibela kae, 'me Basotho ba na le moralo o motle o hanang ho kena tšebetsong e leng bofokoli ba bophethahatsi holima meralo ea bona.

A re moralo oa nako e telele o ka thusoa ka hore

ho sebelisa chelete ba sa hlakisi hore ba tl'o e nka kae, ka hona ba loke-la ho lokisa mekhoha ea pokello ea lekhetho hore bahlanka ba tsebe ho fuoa nyollo ea meputso e hlamatsehlang.

O re ba lumellana le Letona la Lichelete hore Naha ea Lesotho e sebe-tse ka thata ho bona hore ha ba sekisetse mafapha a mang.

A re ba utloisisa hantle hore na boemo ba bophelo ba basebetsi bo joang kahar'a naha.

Mokhothu o re ka lebaka la tlhokahalo ea chelete naha e ka etsa leanole tla thusa ho alosa tšebetso ea likhoebo tse ikemetseng ha ho etsoa litsela le lebala la lifofane, 'me batšehetsi ba teng empa ba lokela ho laoloa. A re pusong ea

Ikemetseng ea Likhetho (IEC), DCEO le Ofisi ea Monamoli li tlameha ho ikemela ho etsa chelete.

O re taba ea hore ba hana ho kenya tlhopho-bocha tšebetsong ha se 'nete hobane 'muso ha oa e abela chelete, ka hona ha ba na ho fetisa melao e tla fetoha mathethebale.

O re litabeng tsa temo 'muso o hlokomele hore e mekhahlelo, le hoja o behile matla holima bahoebi ba ka hlahisang ka bo bona, 'me ha ba ka lebala lihoai tse ntseng li thuthuha ho tla senya temo, ka hona bahoebi ba baholo ba se ke ba ipokella ka lipeo le manyolo.

Letona la Bophelo Mohlomphehi Selibe Mochoboroane, o re ba thatafalletsoe e le 'muso hobane moruo o putlame, lekeno, nyollo ea meputso li tlhahiso le tlaase, 'me ho bohlokoa ke hore moetapele oa bohanyetsi a ba thuse ka malebela. A re ntho e kholo ke hore feela naha e tle ka maano a kenyeletsang batho bohle, ho sebelisoa matla ho hlahisa mesebetsi le ho rekisa motlakase le litaemane, tse lokelang ho sebetsoa kahar'a naha.

O re ho bohlokoa hore 'Muso oa Lesotho o ntlafatse litaba tsa thuto le ho arabela litlhoko tsa hona joale, baithuti ba se ke ba feptjoa feela ba thusoe ka libuka ha banana ba tšehetsoa ka mesangoana ea boitlhoekiso.

Letona la Lichelete Dr. Retšelisitsoe Matlanyane, o re khakanyo ea lichelete e entsoe ho ipapisitsoe le moralo oa naha, 'me ba tlameha ho etsa lintho ba baballa lisebelisoa tseo ba nang le tsona. A re ba kahare ho moruo o tlaase hoo leng boima hore 'muso o hlahise hlooho, kaha ba sa hlahisi letho e le naha. O re moruo oa naha o ka tseba ho ntlafala ha ba itlhamiselitse, kaha ho tla theola litheko tse boima tsa thepa kahar'a naha.



o sireletse moralo oa naha kaha oa naha e se oa mokha ofe kapa ofe. O re sekheo se teng ke hore Molao oa Motheo o hlalosa hore ho be le boto ea meralo ea naha e leng ntho e sieo, 'me mol-emong oa ho tsamaea ka tsela e tšoanang meralong ea naha, boto eo e tlameha ho thehoa.

A re mebuso e lokela ho ba le neheletsano ea mesebetsi nakong eo lipuso li fetohang, kaha ba fanana ka lesokoana ba sa itokisetsa. O re bothata bo boholo bo tjametseng naha ke hore ba batla ho kotula ba sa jala, ba boetse ba bua ka

"Re le Naha ea Lesotho re lokela ho sebetsa ka matla ho bona hore na re itšetleha kae, re thusana joang le linaha tse ling 'me litumellano tsa setsoalle li tlameha ho shejoa ka matla." ke Mokhothu eo.

O re naha e eme ka 2% kholong ea moruo, sekhahla sa keketseho ea litheko ea lintho tseo ba li sebelisang ke 5.5%, ha bahlanka ba nyolletsoe ka 2%. A bontša hore khahlametso ea sechaba e bohlokoa ho ba thusa ho atametsa litlhoko tsa bona kaha litheko li ntse li nyoloha, ka hona 'muso o lokela ho hloka boroko.

molao le khotso 'muso o ikemisetse ho sebetšana le tlhopho-bocha, eo ho bonahalang ba le morao. A re leha e ka fetisoa beke e tlang ho ka ba bohlokoa, empa e ke ke ea beha litholoana kaha e sa hlophisetsoa.

A re taba ena e hloka boitlhopho kaha e tl'o etsa hore ho fetohetse tsamaiso makhotleng, le hore na e tl'o kena tšebetsong kamor'a nako e kae. A re ntho e bohloko ke hore ntlafatso e tlameha ho ba teng mafapheng a 'maloa, hape melao e hloka chelete hore e tsebe ho kena tšebetso le hore Komisi e

Mangope a eketseha

Naha ea Lesotho e maemong a mpefetseng a ho khephoha ha mangope kahar'a metse le metsana ea Basotho, hoo boieane ba tlholeho bo ntseng ho lahleha. Tsena li boletsoe ke Mookameli oa Letlole la Roll, Letsatsi Lesuoane, puisanong le koranta ka la 19 Tlhakubele monongoaha.

O re ba shebane haholo le ho tsoolosa tikoloholo, kaha ho hlokomelehile hore naha e tobane le phephetso e kholo ea tahlehelo ea tikoloho e apereng, e ka thusang ntlafaleng ea naha. O re ba hloka mekhoabo le mehlooli ea metsi e ntlafetseng hore ho lule ho na le phallo ea metsi, kaha maemo ana ha a ntse a tsoelapele lino ka li ka emisa ho phalla le matamo a ba tlokotsing, 'me pokello ea metsi e a haella.

A re ke nako ea hore batho ba leme litlama-tlama tse ts'oarang mobu molemong oa pokello ea boieane ba tlholeho, ba boela ba khothaletsa hape hore batho ba apese naha ka ho lema lifate le mehloa.

Maema Ramaema eo e leng Setsebi sa Pokello ea Lipalo-palo, Bopaki le ho eletsa Sentebale ka Meralo, o supile hore bona ba

na le tumellano ea ts'ebetso le Avocado Vision ho hlaha Afrika Boroa, e ipabotseng ka ho sireletsa tikoloho le ho e ntlafatsa. A re kahar'a morero oa Roll mosebetsi oa hae ke ho hokahanya Basotho 'moho, ho ts'oarela marena lipitso le ho theha lihlopha tsa Basotho tse tla sebetsana le tsoholo ea tikoloho ka mekhatlo ea bona.

A re ba tl'o sheba ka ho fuputsa ho sechaba hore ke eng e tsietsing tikolohong eo ba phelang ho eona, le hore ba ka thabela ho thusoa joang, 'me ke bona ba tla etsa meralo ea ho sireletsa mehlooli ea bona ka lihlopha tse tla tataisoa hore ho be le meralo ea nako e telele.

A re ba tl'o sebetsa 'moho le liofisiri tsa litereke kaha ba na le litsebo, ka ho etsa bonnete ba hore meralo eohle eo ba e etsang e etsoa ka botsebi ba lekala. A re kaha ba qalile ts'ebetso ea bona ka ho sebetsa 'moho le balisana, ke bona ba tlang ho una molemo haholo, ba sa sie bacha le basali hore ba nke boikarabello litabeng tsa ho matlafatsa makhulo le ho baballa tikoloho.

A re ke bonyane 40% ea banana le basali e tlang ho kenella kahar'a morero ona, ebile ba se ba qalile ho ea literekeng ka ho fapakana ho aha likomiti le ho kopana le mafapha ohle



Maema Ramaema, Mookameli Ofising ea Pokello ea Lipalo-palo, Bopaki le ho eletsa ka Meralo Sentebale.

a ikarabellang. A re morero ona o tl'o nka lilemo tse robeli o sebetsa, 'me kamor'a lilemo tse tharo e

tla kena mosebetsing oa boitlhahlobo.

Avocado Vision e ipabola haholo litabeng tsa

ts'ireletso le ntlafatso ea tikoloho Matatiele, 'me ka leballa la ho sebetsa lithabeng ba utloisisa hore ke eona e nepahetseng ho ba thakela ka malebela, haholo ha ba sebetsa ka merero ea bacha.

O re kaha Naha ea Lesotho e bonahala e atetsoe ke sehala-hala ba tl'o batla botsebi bo ikhethang ho kenyeletsa le Likolo tsa Thuto e Phahameng, ho fuputsa hore na se ka sebelisoa le ho baballoa joang ho ntlafatsa naha, eseng se chesoe kapa se fotholoe kaha pelaelo e le hore se na le molemo.

O re ho se sireletse le ho se hlokomele tikoloho ho na le litlamorao litabeng tsa boiketlo ba sechaba, hobane ha e ntlafetse tlhahiso ea mesebetsi e ba teng, le bophelo ba liphoofole e ba bo ntlafetseng.

Roll ke morero o ka tlasa Lekala la Tikoloho le Meru o sebetsanang le ho tsoolosa tikoloho le ho ntlafatsa litsela tsa boipheliso ba batho.

ART WORK

(Publish your manuscript)



Leverage your talent to create a lasting legacy: our staff is ready to assist you on your journey

ORDER NOW

FOR YOUR FUTURE WE CARE

CONTACT US HERE:

Call or whats App: +266 28350815/ 22350224/ 68078124

Email: damaznodprinting@gmail.com / lesaoenat@gmail.com



TSA KEREKE

Ba keteka letsatsi la Moshoeshoe



Staff

Bacha ba Mofumahali oa Lefaatše ba ketekile Letsatsi la Moshoeshoe, ho kenyeletsa ketekelo ea lilemo tse 200 sechaba sa Basotho se thehiloe le kholisole le bonngoe mahareng a bona. Tsena li sibolotse ka Sehlabelo se Halalelang sa 'Missa Mofumahali oa Lefaatše, Mazenod, ka la 17 Tlhakubele monongoaha.

Khothatsong ea hae Fr. Patrick Khoaele OMI, o boletse phutheho hore Moprofeta Jeremia o re tsebisa selekane se secha seo Molimo a ratang ho se theha le rona, ka ho ngola molao oa hae lipelong tsa rona le ka ho re tsoarela libe tsa rona. A hloosa hore taba eo e bolela hore ha re sa tla rutana, kaha re tla be re tseba Morena Molimo kaofela, ho qala ka e monyenane ho isa ho e moholo.

Ha phethela a re Evangeli ea Kriste e re tlama ho lumela ho eena. A re joaloka-

ha tlhaku ea koro e oelang mobung e tlameha ho shoa hore e tle e behe haholo rona re tlameha ho ba joalo, kaha Jesu le eena a amohetse mahloko le lefu, hore a tle a re pholose. A re na re hliile re mo latetse, kapa re ntse re qea-qea, re tšaba mahloko, boitelo le lefu?

Ho sa le joalo, setho sa Kopano ea Josefa ea Halalelang e tekong ea ho theoa kahar'a Kereke e Katholike Lesotho, Monghali Hlalele Michael Manko o boletse hore joaloka likopano tsohle tsa kereke le eona ena e na le sepheo. A re sa mantlha ke ho bopela



A re Kereke e Katholike ka Sakramente ea Hlatsuo ke hona moo e qalang ho kenya bana lerato la Morena Molimo le ho mo tseba.

kereke banna ba tsitsiseng tumelong le bophelong le ho ba chorisana ka lithuto le tumelo ea 'nete ea Kereke e Katholike. Ho tumisa bapapeli ho Jesu Kriste ka ho latela mehlala ea Josefa ea Halalelang monyali oa pelo e hloekileng ea Maria 'Mamolimo. Ho ntlafatsa bophelo ba baprista le ho hlokomela kereke le thepa ea eona molemong oa kanetso ea tumelo. A re ba ntse ba le leetong la ho potoloha le Naha ea Lesotho ho tsebahatsa kopano, 'me ha joale e na le litho 'mishoneng oa Roma, Nazareth, St. Vincent le Mofumahali oa Lefaatše moo ba ileng ba etsa senyamo 'me ba fumana litho tse tšeletseng tse ncha.



2023-2024 SELEMO B SONTAHA SA MAHLOMOLA

Isaia 50,4-7

Pesalema 21

Ba-Fillipi 2,6-11

Mareka 14,1-15,47

Khothatso



Mahloko le lefu la Kriste

Sontaha sena se le fa nako ea ho boinahano holima mahloko, tlhokofatso le lefu la Morena Jesu. Matsatsing ana a setseng a Karisima ho bohlokoa hore e mong le e mong oa rona a ke a inahane ka lerato la Kriste ea ileng a feta har'a litlokotsi tse ngata.

Ha re shebeng liketsahalo tse hlahang Mangolong a Halalelang moo Morena Jesu a ileng a utloa bohloko, a soabisoa le ho hloko-fatsoa; o ile a ekoa ke Judas Iskariota (Mareka 14:44), bopaki ba bohata khahlanong le eena (Mareka 14:56), a ahloleloa lefu a ba tsoeloa ka mathe (Mareka 14:65), a otloa ka letsoho makhetlo a mangata (Mareka 14:65), a shapthoa 'me a tsoa mali (Matheus 27:26), a roesoa mofapahlooho oa meutloa hloohong, (Joannes 19:2), a hlobolisoa liaparo tsa hae (Matheus 27:28).

A sonngoa hore ke Morena oa Bajuda (Matheus 27:28), a otloa hloohong ka leqala (Matheus 27:30), a hobosoa ka ho khumame-loa (Mareka 19:20), ba arola seaparo sa hae ka lotho (Matheus 27:35), a otloa ke masole (Joannes 19:3), lipekere tsa phunya matsoho le maoto a hae a halalelang (Joannes 19:18), a fua metsi le asene ka seponche (Mareka 15:36), a nehela Moea 'me a shoa sefapanong (Luka 23:46) 'me qetellong a hlajoa lehlakoreng ka lerumo (Joannes 19:34).

Ha le bala e 'ngoe le e 'ngoe ea lintlha tseo le etse khutso lipakeng ho inahana ka botebo ka tsona, motho a ke a lekole bophelo ba hae. A shebe hore na mahloko ao Morena a fetileng ho ona ke mahala, kapa chee bophelo ba hae bo bontša tsoabo kapa teboho. Tsela ea bophelo eo u e kethileng e u lebisisa pholohong eo u e lokiselitsoeng ke Morena ka mahloko a hae kapa u iphelela ho latela litakatso tsa nama.

U iphetotse letsoai kapa temoso e lomoang lefatše ka mehlala metle ea bophelo ba bokriste, ho phehella tumelong ho Kriste, kapa u khelosa batho ka lipolelo, lipuo le liketso tsa hao. Mohla Molimo Ntate a u biletlang ho eena u tla ema ka sebete kapel'a hae hobane u phethile litokelo tsohle tsa hao lefatšeng, kapa u tla ema ka thothomelo le tšabo e le ho amohela mohau le grasias ea hae.

Qalella hona joale ho lokisetsa bolulo boo Morena Jesu a bo shoetseng lehaeng le sa boleng. Morena Molimo o rata hore e mong le e mong oa bana ba hae a finyelle thabong e sa feleng ea Leholimo, ke ka hona a ileng a tela Mor'a hae a Inotši ho shoela bohle. Lena ke lerato le hlolang leo ho seng motho ea phelang lefatšeng ea sa le boneng. Lerato lena le hloka motho ea le khutlisang, ea le amohelang ka pelo eohle ea hae. Ana u tseba bohloko ba ho rata motho, ho 'montša lerato le kutloelo-bohloko ebe eena ha u natse le hanyane feela? Haeba uena u utloa bohloko ka motho eo u sa mo etsatsang letho hakaalo, ebe ho joang ho Morena Molimo ea ileng a fana ka Mor'a hae eo a mo ratang, ho tla nyefoala le ho tsoeloa ka mathe ke batho ba lefatše ba se nang le matla holima hae?

Bontšang ka liketso tsa lona le tlohele lipuo hore e feela le le Bakriste ba 'nete ba sebele. Batho ba tsebe hore le Bakriste le latela mesebetsi eohle ea lona ea tumelo, ho rata ba bang joalokaha le ithata, le thusa ba tllokotsing haholo mafutsana, bahloki le bahlolohali. Phelang ka tsela ea bokriste e pakahatsang hore lefatšeng mona le baeti, lehae la lona la 'nete le Leholimong. E bang lebaka leo bahetene ba ka ratang ho sokolohela ho Morena, 'me ba lumele ka 'nete le ka tieo hore Jesu Kriste o tile lefatšeng ho tla pholosa bohle. Morena a ke a le fe matla le moea oa boitelo hore le mo sebeletse, le khantšetse lefatše ka leseli le tsoang ho Kriste.

Bahalaleli har'a Beke

25 Tlhakubele

Dula

26 Tlhakubele

Margaret Clitherow

27 Tlhakubele

Rupert

28 Tlhakubele

Venturino oa Bergamo

29 Tlhakubele

Berthold

30 Tlhakubele

Peter Regulatus

LBA e phethela lipapali tsa liki



Tšeliso Thakholi

Mokhatlo oa Lesotho oa Papali ea Basketball (LBA), o ile oa tšoara litholisano tse phethelang Liki ea Likolo tse Phahameng tse sa kang tsa fela, ka lebaka la mathata a ileng a hlahela Mokhatlo ngoahola. Litholisano tsena li bile Holong ea Khosatsana 'Maseiso Memorial, Matsieng, ka la 17 Tlhakubele monongoaha.

Mekhahlelo eo ho neng ho hlophisanoa ho eona ebile ea bahlankana le baroetsana, ba likolo tse robeli tse hlahileng boemong ba borobeli liking. Le hoja ho bile teng likolo tse tharo feela e leng tse Phahameng sa Sophia, Machabeng le Se-fika. Ha tse ling tse hlano tse neng li lokela ho ba teng, li ile tsa hloleha, kaha barutoana ba tsona ba itokisetse ho tla ngola lihlahlobo.

Ke hona litholisano tse tse na moo sekolo se ileng sa ikhabela mohope mokhahlelong oa bahlankana ebile Sekolo se Phahameng sa Sophia Seterekeng sa Butha-Buthe. Athe ka ho baroetsana mohloli ke Sekolo se Phahameng sa Machabeng Seterekeng sa Maseru.

Puisanong le Raliphatlatso oa LBA, Monghali Samuel Mot-samai o supile hore morero o moholo ka litholisano tsena ke ho holisa papali ea Basketball le ho tsoma talenta lilemong tse tlaase. "Ke hona moo re qalang ho ruta papali ena. Re qala ho ruta bana ha ba le likolong tsa Mathomo le tse Phahameng." A rialo.

A re morero o mong ke ho lokisa lihlopha tse nyenyane, ho li isa boemong ba lihlopha tse kholo ho ea boemong ba naha. Motsamai o re maikamisetso a maholo kahar'a Mokhatlo, ke ho haola le liter-eke tsa Lesotho ho fofonela talenta ea papali ea Basket-

ball le ho hohela barutoana ho itahlela ka setotsoana papaling ea Basketball.

Mokoetlisi oa Sekolo se Phahameng sa Sophia, Monghali Makopoi 'Mabolang o itse lekunutu le leholo la bona la

hore ebe ba boetse ba sirelelitse mohope, ke ho sebetsa ka thata ka ho tla lebaleng ka lina-ko tsohle. Ka holimo ho tsohle, o itse ke ho ba le lerato la papali le ho ruta bana maqiti le mahlale ao ba ka a sebelisang.

A phethela ka hore ba il'o tsoelapele ho ikoetlisa ka matla e le hore ha liki e ncha e qala ba be ba nse ba le teng kahare ho lihlopha tse robeli tse ka holimo. President ea LBA, Monghali

Molupe Ratšolo o ile a koala ka molao litholisano tsena, ka ho leboha bohle ba kentseng letsoho. A ipiletsa ho bohle ho ea sebetsa ka thata ho holisa papali ea Basketball.



Lesotho le'a khotatsa

Tšeliso Thakholi

Lipalami tsa Naha ea Lesotho tsa libaesekele ha li itheke moralo ka ho qala ka tšebetso e tsoileng matsoho ea ho hlaha kahar'a lipalami tse hlano tsa pele, mojaong oa libaesekele oa boemo ba machaba oa bolele ba 126km, o neng o tloha Setsing sa Likhoebo sa MGC ho leba Bocheletsana tikolohong ea Mantšonyane, ka la 17 Tlhakubele monongoaha.

Mojao ona o neng o arotsoe ka mekhahlelo e mehlano, o ne o kenetsoe ke linaha tse fapaneng ho hlaha tikolohong ea Afrika tse kang Afrika Boroa, Zimbabwe, Botswana le Lesotho e le lona le amohelang baeti. Mojao oa pele oa bolele ba 126km o ne o kenetsoe

ke banna ba 50 le mosali a le mong. Ka hona mohloli ebile Matlhokgonolo Motlhodi oa Naha ea Botswana, eo ebileng e leng eena mpoli oa mojado oa libaesekele Naheng ea habo.

Maamong a bobeli ebile Phetsetso Monese, borarong ea eba Eric Ramohanoe, boneng ea eba Norlan Hoffman oa Afrika Boroa, bohlanong ea eba Teboho Khantši. Haele mokhahlelong oa 42km, o neng o tloha Letamong Ha Mohale ho leba Bocheletsana mohloli ebile Khothalang Rakaota, bobeling ea eba Zindala oa Zimbabwe ha borarong ebile Malefane Retshedisitswe oa Afrika Boroa. Ka ho basali boemong ba pele ebile Pontšo Makatile, bobeling ea eba Tšepiso Lerata ha borarong ebile 'Matoka Maboee. Lipalami tsena li atlehile ho qeta nako ea tsona ea lihore tse hlano.

Puisanong le Raliphatlat-



so oa Mokhatlo oa Lesotho oa Libaesekele(FCL), Monghali Malefatsane Morie o boletse hore sepheo se sehlo sa mojado ona, e ne e le ho tlotlisa letsatsi la tsoalo la Tona-Kholo Samuel Matekane. A re o motlotlo haholo kaha mojahong ona ho ne ho boetse ho tsoang kantle ho naha, kaha sena se thusitse tsa Lesotho ho ipekha hore na ba matla ha kae le hore na ba tsoang kantle ba fokola kae le ho ba matla ho kae.

A tiisa hore bosieo ba sepalami se hloahloa sa Lesotho, e leng Kabelo Makatile ea ntse a le naheng ea Ghana, lipapaling tsa All Afrika Games ke bona bo entseng hore mohope ona o lebe Naheng ea Botswana. A thoholetsa lipal-

ami tsa Naha ea Lesotho ka katleho eo li e fihletseng ea ho qeta mojado ona, o nang le meepe e mengata e boima. "Hona ke pontšo ea hore ho na le moo naha ea habo rona e eang ka papali ena, ha feela re ka fumana litholisano tse 'maloa." O boletse joalo a bile a isa liteboho tse khethehileng ho bohle ba atlehisitseng lipapali tsena.

A qetella ka ho boela a tiisa hore lebelong la monongoaha ho bile le likotsi tse fokolang haholo, tseo lipalami li neng li chaisana ka bo tsona, papising le ngoahola moo mojado o ileng oa se ke oa tsoelapele ka lebaka le kotsi e mpe e neng e hlahela ba bang ba lipalami, ha moqhoobi oa koloi ea 4+1 a chaisa le ho ntša likotsi tse mpe ba bang ba lipalami.



Matlama e hapa Mohope oa Sechaba

Tšeliso Thakholi

Letsatsi leo e leng khale le lebeletsoe la litlholisano tsa Mohope oa Sechaba (People's Cup), le ile la chaba le sa hane, moo Sehlopha sa Bolo ea Maoto sa Matlama se entseng mohlolo lekhetlo la pele se qala ho kena litlholisanong tsena ha se feta sholane, 'me se pshatla LMPS ka (4)1-1(3) thahong ea mekoko, papaling ea ho qetela ea makhaola-khang a Mohope ona Lebaleng la Sam Matekane Bocheletsana, ka la 16

Tlhakubele monongoaha.

Tlholo ea Matlama e fane ka thuto ho barati le batšehetsi ba bolo ea maoto hore e na le monyetla o moholo oa ho boela e tsosolosa bocha nalane ea eona, ka ho hapa Mohope oa Liki e Kholo kamor'a nako e telele.

Litile-tile tsa barati ba lipapali tse neng li khobokane ka bongata, li bone ka mahlo ha khalala ea sehlopha sa Matlama, Rethabile Mokokoane a hakisa bolo letlooa metsotsong e mearo ea ho qetela ea papali eba 1-0. Ea re moo Matlama e sa ileng le khongoana holimo, Roboama Koloti oa LMPS e neng e chesa tuku-



tuku a lekanya lintlha eba 1-1. Tsa ea thahong ea mekoko moo sethibathibane sa Matlama, Monaheng Ramalefane a ileng a hapela sehlopha sa habo tlholo ka ho

hlaba mokoko oa ho qetela ea eba 4-3.

Babohi ba papali ena ba boetse ba bona, ha Mokoetlisi oa LMPS Monghali Tšeliso Molete a fetola libapali

tsa hae khafetsa, ho leka ho matlafatsa sehlopha sa hae, kaha mokhathala o ne o se o bonahala o iphile matla lihlopheng tsena ka bobeli, empa sena ha sea ka sa mo tsoalla katleho ea letho. Libolo tse ngata tse neng li raheloa lipalong ke mohlankana ea neng a le kotsi oa LMPS Roboama Koloti li ne li fumana sethibathibane Monaheng Ramalefane a se a ntse a li emetse.

Ha papali e qeta ho fela batho ba ne ba sa ome mathe, ka ho khotsa papali e tsoileng matsoho e neng e bapaloa ke LMPS le Matlama. Matlama e ile ea ikhapela M650,000.00, bobeling ea eba LMPS ka M300,000.00 borarong ea eba Linare, ha boneng e bile Bantu e ileng ea hlolaha ho sireletsa mohope ona monongoaha, 'me lihlopha ka bobeli li ile tsa hlakoloa meokho ka M200,000.00 sehlopha ka seng.



Komiti ea WSL e fa balateli tšepo

Tšeliso Thakholi


Komiti e kholo e Tsamaisang Papali ea Bolo ea Maoto ea Basali (Womens Super League), e tšepisa ho sebetsa ka thata ho ntlafatsa papali ea bolo ea maoto ea basali kahar'a naha le ho bulela basali menyetla litabeng tsa koetliso, boletsaphala le ho tsamaisa lihlopha tsa bona tsa bolo ea maoto.

Lebitsong la komiti ena e ncha e khethiloeng 'mokeng o bileng Bambatha, Maseru, ka la 17 Tlhakubele monongoaha Raliphatlalato e mocha eo e neng e le setho sa komiti e fetileng, Monghali Bolokoe Mohale o re ba ike-miselitse e le komiti e ncha

ho sebetsa ka thata ho ntlafatsa papali ea bolo ea basali kahar'a naha.

O re joalokaha e se motho e mocha komiting ena, ba ne ba se ba e-na le moralo oa ho holisa papali naha ka bophara oo ba tlii'o o ntšetsa pele, oa ho etsa hore tlholisano e be matla e le ho bebofaletsa bakoetlisi ho etsa khetho e bobebe bakeng sa Sehlopha sa Naha sa Mehalitoe. A re ba tlii'o bula mamati ho fa basali menyetla e mengata ea ho ba tsamaisong ea papali ena. A leboha ka mokhoa o khethehileng beng ba lihlopha tse kholo, ba ntseng ba ba tšepetse mosebetsi ona o matla oa ho tsamaisa lipapali tsa basali.

Komiti e khethiloeng President e ntse e le Baholo Motene ho tsoa Seterekeng sa Maseru, eo e neng e ntse e le President ea WSL nankong e fetileng, 'me sena ke



sesupo sa hore tšebetso ea hae e ntle haholo papaling ea bolo ea maoto ea basali. Boemo boo Naha ea Lesotho e leng ho bona ke bopaki ba hore Afrika e se e hlokometse hore basali ba Lesotho ba ipabola papaling ea bolo ea maoto.

Motlatsi oa hae ke 'Mapula Machelo oa Butha-Buthe, eo e neng e le setho sa komiti sa nako e fetileng, Mongoli e Moholo e mocha ke Makhokolotso Tloli ho hlaha Mokhotlong, motlatsi oa hae ke Thabo Mpete oa Berea. Haele Raliphatlalato ke Bolokoe 'Kotara' Mohale ho tsoa Thaba-Tseka, eo komiting e tsoa feta e ne e le setho moeletsi. Litho baeletsi ke Lineo Mosuoane oa Leribe, Liepollo Tauhali oa Mohale's Hoek le Mphahama Mosothoane oa Qacha's Nek. Komiti ena e ncha e lebeletsoe ho nka lilemo tse 'ne.